

Sra. Jennifer Tjon A Meeuw, Directora di Stichting Balansa Nobo

Un por medio di 24 mil ciudadano na Aruba ta biba riba un nivel mas halto cu nan salario



ORANJESTAD – Segun Sra. Jennifer Tjon A Meeuw, Directora di Stichting Balansa Nobo

Un por medio di 24 mil ciudadano na Aruba ta biba riba un nivel mas halto cu nan salario.

Educacion pa sa con pa maneha nos finanzas y tuma decisionnan responsabel ta importante pa e bienestar di henter un pais. Hopi ta esunnan rond di cada un di nos cu ta biba di salario pa salario, como tambe esunnan cu nan salario no ta completamente alcansa nan proximo pago. Esaki ta algo cu trece hopi 'stress' riba un famia, un pareha, un matrimonio. E ta trece opresion y por hasta trece separacion den famia y consecuentemente e yiunan ta sufri bou di esaki.

SOCIALE ZAKEN

Den un entrevista cu **BON DIA ARUBA** a hiba cu Stichting Balansa Nobo, Sra. Jennifer Tjon A Meeuw, Directora di e fundacion a indica cu 'educacion financiero' na Aruba ta hopi abou.

Tjon A Meeuw ta splica **BON DIA ARUBA** cu un di e ultimo encuestanan teni pa CBA (Centraal Bureau Statistiek) a mostra cu tin un por medio di 24 mil ciudadano na Aruba cu ta biba riba un nivel mas halto cu nan salario. Stichting Balansa Nobo ta un iniciativa cu a nace na departamento di asuntonan social (Sociale



Zaken) ya cu nan a ripara cu na Aruba tin hopi problema financiero. Mayoria di e personanan cu ta yega departamento di asuntonan social, un di nan problema primordial ta finanzas. Asina tambe e 'bestuur' di locual awe ta Stichting Balansa Nobo, a bini hunto na aña 2009 pa inicia e preparacionnan y nan a habri nan porta pa nan prome cliente na aña 2010.

DIFERENTE CLASE

Segun Tjon A Meeuw, un ehempel comun ta unda un persona ta gana por ehempel 2 mil florin pa luna y e persona su debenan so, ta surpasa e

2 mil florin caba. Di e manera aki nan ta ripara cu e hendenan no tin cuminda, paña of necesidadnan pa e muchanan bay scol. Hopi ta purba di busca 'side job', pero mayoria biaha e personanan aki ta 'gewoon' bay fia y bira creatief. Tjon A Meeuw ta subraya cu esaki no ta solamente pa esunnan di menos recurso pasobra na oficina di Stichting Balansa Nobo, nan a yega di haya hende di tur diferente clase (nivel) den nos comunidad.

TABOO

E ta sigui bisa cu na Aruba, debe ta un taboo. "Tur hende



kier papia di nan auto nobo of cosnan bon, pero niun hende no ta papia di debe. Te na momento cu e ta un chaos completo". Tjon A Meeuw ta remarca cu e ta hopi importante cu e asunto di debe ta wordo treci dilanti y papia abiertamente riba dje ya cu esaki no ta algo pa e resto di mundo so, pasobra Aruba tambe tin hopi problema cu su ciudadanonan bibando den debe.

EDUCACION

Stichting Balansa Nobo, ta traha hunto cu otro fundacionnan cu ta traha riba tereno social cu asina ta referi nan clientenan cerca nan, segun nan necesidad. "Financieel educatie" ta hopi abou aki na Aruba. Algo cu ta cuminsa for di chikito caba. Un di e problemanan primordial ta falta di prioridad.

Hendenan no sa con pa priorisa y e balor di nos florin awe ta hopi diferente compara cu 10 aña pasa", Tjon A Meeuw ta indica, remarcando cu for di chikito caba nos mester siña nos yiunan of nos studentenan, con pa nan anda cu placa a base di locual cu ta

necesario.

PRESUPUESTO MENSUAL

Tjon A Meeuw ta bisa cu 90 porciento di hogarnan na Aruba, no ta traha un presupuesto mensual na cas. Y ta hiba un maneho basa riba emocion. "Aki ta unda nos mester bay bek y tuma control y maneha nos finanzas. Hopi di e hendenan aki ta inteligente y tin un bon trabou pero toch el a bira for di control." Na Aruba, e ta masha facil pa fia placa cerca sea instancianan di fia placa, como tambe cerca amigonan. Y si no tin un presupuesto traha unda por visualisa e prioridadnan y paga esakinan como tal, cosnan indudablemente, ta bay for di man.

Stichting Balansa Nobo, ta un fundacion subsidia pa Gobierno di Aruba como tambe Sede Aruba cu ta traha cu diferente otro instancianan social y ta enfoca pa yuda famianan na un comienso nobo, door di alinea nan comportacion financiero na uno sano y bon balansa. Nan ta haci esaki por medio di 'Budget Coaching' of 'Budget Management'. □